

Protocol dalla 6-avla radunonza generala 2018 a Trun ella sala da cultura, ils 14-11-2018

Gliesta da tractandas

1. Beinvegni
2. Approbaziun dalla gliesta da tractandas
3. Elecziun da dus dumbravuschs
4. Approbaziun dil protocol dalla radunonza generala dils 14 da settember 2016 (il protocol ei d'anflar silla pagina d'internet)
5. Rendaquen
6. Preventiv 2018/19
7. Rapport dil president
8. Rapports da commembras e commembers da suprastonza PIS
9. Elecziuns
10. Salid dall'Engiadina
11. Varia

1. Beinvegni

Nies president Lorenz Alig (LA) fa a tuts presents in cordial beinvegni. Specialmein beneventa el ils deputai dil Cussegl grond, Clemens Berther, Diego Deplazes e Roman Cantieni, il president communal da Trun, Dumeni Tomatschett, il suprastont dalla Ligia Romontscha Donat Nay, il secretari general dalla Ligia Romontscha, Martin Gabriel, il president dalla Surselva Romontscha, Vitus Gartmann, dr. Arnold Spescha, il president communal da Sumvitg, Armin Candinas, la delegaziun dall'Engiadina cun Curdin Brunold che remplazza il president Domenic Toutsch, e Chatrina Urech. LA prelegia las perstgisas ch'el ha survegniu en scret ni entras contact persunal: cusseglier dils stans Stefan Engler e Martin Schmid, cusseglier naziunal Martin Candinas, il cusseglier guvernativ Mario Cavigelli ed ils ulteriurs cussegliers guvernativs, dalla gruppa romontscha dil Cussegl grond Emil Müller, Kevin Brunold, Gabriela Thoman, Gabriela Tomaschett, Gian Michael, Silvia Casutt, la presidenta dalla vischnaunca Glion Carmelia Maissen ed il parlamentari Gion Matias Cadruvi, plinavon igl anteriur president dalla PIS Heinrich Berther che sa buc vegnir muort in mortori, il president dalla Ligia Romontscha Johannes Flury, il president dalla PIE Domenic Toutsch, la suprastonta dalla PIE Renata Bott, e deplorablamein ston era duas commembras da nossa suprastonza seperstgisar: Mengia Isenbügel e Carin Cadruvi sco era las revisuras da quen Irena Bonomo ed Evelina Giger. Plinavon ein seperstgisai Jan-Andrea Bernhard, il meinascola dil consorzi da scola da Glion Silvio Dietrich, Martin Lombris ed Andrea Montalta dil Cussegl da scola Schluein. Alla vischnaunca da Trun admetta LA in cordial engraziament che la PI ha astgau duvrrar las localitads gia dapi sia fundaziun quasi mintga gada cheu a Trun. Trun cuagl ischi seigi in liug historic cun il simbol d'unitad e resistenza.

2. Gliesta da tractandas

LA prelegia la gliesta da tractandas e lai approbar tala.

3. Elecziun da dus dumbravuschs

LA propona Vitus Gartmann e Mauro Friberg che vegnan elegi unanimamein.

4. Approbaziun dil protocol dalla radunonza generala dils 14 da settember 2016

LA sutmetta il protocol per l'approbaziun. El vegn approbaus unanimamein. LA engrazia a Tresa Deplazes e menziunescha che lezza seigi era questa sera pronta da scriver il protocol.

5. Rendaquen

LA dat il plaid ad Adelina Vincenz (AV) che presenta il rendaquen dils onns 2016 e 2017

AV engrazia gl'empren per il sustegn finzial dils commembers.

La fin da da november 2016 haveien nus retschert l'emprema part dils daners pils dretgs d'utilisaziun dil mied da romontsch "Access", pia 100'000.- frs.

La secunda part seigi suandada il zercladur 2017. La PIS hagi lu indemnisau ils collaboraturs aunc igl onn 2017. La PIS hagi era pagau ils cuosts socials da 11'055.- frs.

Cunquei che nus haveien buc fatg radunonza generala igl onn 2017 maunchien las contribuziuns facultativas dils commembers.

Cunquei che neginas dallas revisuras ein presentas vegn il rapport projectaus e prelegius.

Ei vegn fatg neginas damondas ni remarclas. LA fa la tscharna ed il quen vegn approbaus unanimamein.

6. Preventiv

AV presenta il preventiv 2018/19. Quel preveda ina sperdita da 2'000.- frs ed expensas totalas da 18'000.- frs. Il preventiv vegn approbaus cun in applaus.

7. Rapport dil president

LA lai repassar siu temps da presidi naven da si'entschatta, ils 13-03-2015 tochen oz.

El hagi surpriu quei presidi suenter Heinrich Berther cun respect mo era cun perschasiun, cun plascher e cun absoluta promptadad da s'engaschar en favur da nossa biala viarva romontscha, e da cumbatter oravontut per il sursilvan. El communichescha ch'el vegni a remetter oz, suenter 4 onns uffeci, il post da presidi. El menziunescha ch'ina dallas grondas sfidas en quei temps seigi stau il definir ils idioms sco lungatgs d'alfabetisaziun el Plan d'instrucziun21(P21).

Schegie che la lescha vertenta da scola garanteschi allas vischnauncas l'autoridad da decider davart il lungatg uffical e da scola, seigi ei vegniu fixau el P21 il rg sco lungatg da scrtira per gl'entir temps da scola obligatori sper ils idioms e cun cumpetenzas d'examinaziun. Quei dictat hagian las PIES cumbattiu cun vehemenza e grond

success. Ei seigi denton mo reussiu pervia dalla stretga ed exemplarica collaboraziun denter las PI Engiadina e Surselva, ed en collaboraziun cun la Ligia Romontscha. El vegli uss surdar la bitgetta en novs mauns. Sco president dalla grupp romontscha dil Cussegl grond resti el denton vinavon fideivels el cumbat pil romontsch e pils idioms. Las finamiras dall'uniun seigien contonschidas practicamein diltuttatfatg. Ei munti uss defender e mantener il contonschiu. Il president engrazia allas consuprastontas ed als consuprastonts per la buna e stretga collaboraziun. Era als presents drezza LA in grond engraziament pigl engaschi per la fideivladad e la confidanza demussada. El engrazia era la tuttas persunas ed ad instituziuns politicas e culturalas che hagian dau il support per nos idioms.

8. Rapports dils commembers da suprastonza

Francestg Friberg rapporta dalla situaziun dils mieds d'instrucziun romontschs suenter la decisiun dil Cussegl grond dil 2003 da mo pli edir mieds da scola romontschs en rg naven dil 2005 e tgei effect che quella decisiun hagi giu silla situaziun tochen il 2011, e co la PI hagi influenzau dapi lu la situaziun tochen oz. Alla fin vegn ei veseivel tgei ch'il cantun ha gia ediu els idioms, e tgei che manca aunc per ademplir las pretensiuns per instruir tenor il niev P21.

Adrian Cathomas rapporta dil svilup dil mied d'instrucziun Access che la PI ha sviluppau sin agen cuost e per mussar co ins sa crear in fetg bien mied flexibel, speditiv ed innovativ per las scolas romontschas. Aschia ha il cantun sentiu il squetsch da sestentar per in mied da romontsch per tuttas scolas idiomaticas tenor las pretensiuns dil niev plan d'instrucziun. Plinavon resumescha el il process dallas contractivas dalla PI cul cantun per vender ils dretgs d'utilisaziun dil mied Access.

Tresa Deplazes rapporta davart svilup dils plogns dils geniturs pertuccai cun affons che han stuiu cuntinuar cun rg en scola, ferton che las vischnauncas vevien decidiu da turnar agl idiom sco lungatg da scola. Quels plogns seigien buc stai vans. Schegie ch'ils plogns hagian buc midau la situaziun dils affon pertuccai, hagi la Dertgira federala confirmau che l'autoridad da decider davart il lungatg official e da scola schagi tiellas vischnauncas e ch'il cantun hagi aschia stuiu reagir enten sestentar per mieds da scola els idioms per garantir l'instrucziun tenor il P21.

LA declara en quei liug ch'el hagi dumandau ensemen cun Luca Tenchio il DECA con ch'ei custassi d'edir immediatamein ils mieds basigneivels, ed ei seigien secunvegni ch'ei vessi buc fatg senn d'arver ina debatta el Cussegl grond per aschia in credit. Ils mieds baseigneivels vegnien uss realisai dafertontier ord la cassa currenta.

9. Elecziuns

LA presenta la consuprastonta Tresa Deplazes sco candidata pil presidi che la suprastonza propona per l'elecziun, e damonda sch'ei detti ulteriuras propostas ord il miez dalla radunonza. Cun quei che gliez ei buc il cass vegn Tresa Deplazes elegiada cun in applaus. TD engrazia per l'elecziun e menziunescha che la PI hagi uss en special il pensum da pertgitar e schar s'infirmir il contonschiu ed accumpignar il svilup dalla producziun dils mieds da scola.

LA punctuescha che tuttas personas seigien s'engaschadas durant l'existenza dalla PI cun grond engaschi sper famiglia e professiun. Ella formaziun actuala dalla PIS detti ei 4 ulteriuras abdicaziuns: Elisabeth Bass (2015), Mengia Isenbügel (2014), Susanna Spescha (2015) ed Adrian Cathomas (2011). LA drezza plaid d'engraziament a mintga singul e surdat in present. Silsuenter entscheiva LA cull'introducziun per l'elecziun d'in ulteriur suprastont e sto vegnir interruts per che Francestg Friberg sappi aunc drizzar il plaid d'engraziament a nies president per ses gronds merets. FF menziunescha ils 3 success che LA ha contonschiu en siu temps d'uffeci per la PI. LA seigi entaus en uffeci amiez in dils ulteriurs cumbats politics. El hagi menau las contractivas culla LR, cul cantun e culla gruppa romontscha dil Cussegl grond cun immens engaschi politic. Il resultat seigi lu stau la reducziun dil rg sil scalem superiur el P21 sil minimum, numnadamein il tractament passiv, marginal. In ulteriur accent che la PI hagi saviu dar il 2016 cun LA al tgamun seigi stau la vendita dils dretgs d'utilisaziun dil mied d'instrucziun Access. Grazia a sia moda detscharta en patratg e plaid seigi ei la finfinala stau pusseivel d'urbir ora dils 30'000.- frs offeri dalla Scola aulta da pedagogia la biala summa da 200'000.- frs per ils dretgs d'utilisaziun, che ein uss vegni parti sils rodond 60 scolasts e scolastas che han luvrau vid il mied Access. La 3. caussa seigi igl engaschi en connex cul postulat Semadeni nua che LA hagi dumignau cun nus ensemen ch'il postulat vegni sustenius mo sche la construcziun che pretendeva in support pil rg vegni relativada. Cun in extract dil Telesguard dils 24 d'october 2018 finescha FF la laudatio remarcond che quella sequenza illustreschi igl engaschi el Cussegl grond e la natira cumbattenta da LA.

LA engrazia a Francetg per sia laudatio.

LA declara che cun las abdicaziuns en suprastontza e l'elecziun dalla presidenta stettien uss 4 personas a disposiziun en suprastontza. Ei drovi tenor statuts denton silmeins 5 personas e perquei seigi la suprastontza ida alla tscherca d'ina persona adattada. FF presenta Diego Deplazes e di che nus haveien giu cletg d'anflar entras el ina persona activa ella politica, el Cussegl grond, e che hagi era experienza el sector dalla scola entras ver dau scola primara ed era entras esser staus el Cussegl da scola. Diego Deplazes pren sinquei il plaid. El salida tuts presents ed engrazia per la confidanza. El declara ch'el seigi s'informaus tgei che fussi lu sia incarica ed el hagi saviu constatar che la PI hagi contonschiu gia dabia, ch'il cantun hagi denton aunc ina pulita lavur da procurar pils mieds d'instrucziun necessaris, ed en quei grau seigi ei da mirar ch'ei vegni produciu ils mieds impurtonts en fuorma moderna per che nos affons hagien plascher d'emprender e mantener nies lungatg mumma.

El vegn elegius cun in grond applaus.

10. Salid dall'Engiadina

LA dat il plaid a Curdin Brunold che fa quei en num dil president dalla PIE Domenic Toutsch. El punctuescha la buna collaboraziun denter la Surselva e l'Engiadina, e che quella seigi stada la garanzia dil success contonschiu. Tuts hagien adina luvrau nunstunclentadamein senza vegnir numnai, senza vegnir pagai e senza vegnir premiai. La paga seigi il success ch'ins hagi survegniu raschun. Senza la PI fussi il rg integraus

oz el P21. Andrea Urech hagi da lezzas uras - fundaziun dalla PI - giavischau che la finamira finala dalla PI stoppi esser da contonscher ch'il cantun surprandi puspei la responsablada d'edir tut ils mieds d'insrtucziun per las scolas en tuts idioms. Quei seigi uss contonschiu e seigi era vegniu menziunau pliras gadas oz. La PI hagi dau ina vusch alla basa romontscha ed hagi era duvrau quella. Las novas suprastonzas stoppien uss s'orientar daniev. El giavischa alla PI cun novas forzas success, in'ureglia aviarta, in egl attent e ch'il pugn vegni prius ord sac sch'ei fetschi da basegns. El engrazia al president partent e giavischa tut il bien alla presidenta nievelegida. Per finir fa el in giug da plaid: El speri ch'il successur dil "catschadur" sustegni la "parola" da Pro Idioms.

11. Varia

LA dat il plaid ad Arnold Spescha che fa in grond compliment alla PI che hagi contonschiu la finamira ed engrazia pil grond engaschi en general pil romontsch. La PI hagi era contonschiu in cert ruaus el moviment romontsch e cunzun era en scola. A LA engrazia el per siu grond engaschi e giavischa a TD in bien maun per menar vinavon la barca. A tuts fa el in grond appel da buc esser indifferents, da far tut il pusseivel per dar vinavon il romontsch enten tschintschar romontsch e buc mo tschintschar sur dil romontsch.

LA engrazia ad Arnold, e cunquei che negin s'annuzia pli, finescha el engraziand als commembers per il sustegn. El fa era attents da buc spitgar mo dalla suprastonza igl engaschi, mobein era da mintgin sez sedumandar tgei ch'el savessi far per il manteniment dil romontsch. Lu seigi el perschuadius che nus damognien era ils cumbats dil futur pil manteniment da nossa biala faviala romontscha.

LA envida tuts agl aperitiv e giavischa in bien retuorn a casa.

Per il sura,
Tresa Deplazes, Schnaus